



雲臺新志

ル 5
1103
5



1103
卷 5

雲臺新志卷第十二

票鹽上

國家府海之利兩淮為大淮北者淮南之一隅計兩淮額行綱鹽百六十萬餘引而淮北僅三十萬引其產鹽共二十三場而淮北僅三場然值旺產亦不下五六十萬引史記貨殖傳彭城以東東海吳廣陵有海鹽之饒東海即淮北而廣陵則淮南也故淮南之利弊視淮北為盛衰其敝也淮北最甚其效也亦惟淮北最速故道光十一年奏行票鹽設局收稅之法必先試行於淮北焉票鹽者名

明
年
月
日



雲臺新志 卷第十二 票鹽上 一

見明史食貨志嘉靖中准於兩浙官商不到之僻
邑立爲山商每百斤納稅銀八分給票行鹽而每
年祇收稅銀二千餘兩卽今兩浙山東四川票引
兼行之法亦卽文獻通考宋時河北滷地土鹽每
斤量稅一錢之法利皆甚微羈縻而已從未聞以
數十萬引之錢糧經費一旦改商運歸民販而倍
銷溢額下令於流水之源如淮北今日者不明綱
鹽之所以弊則不知票鹽之所以利且不知票鹽
之易簡久大可推行於天下蓋官鹽之不能敵私
由於成本之過重淮南成本重於科則於根窩於

岸費淮北成本則莫重於運道之艱而銀價與岸
費次之所謂弊在運道者淮南之鹽由泰壩至儀
徵一水直達淮北鹽河則以中運河爲來源春夏
皆閉閘蓄水以濟漕運而一歲之鹽取足於一秋
其閘占運本者一始由場鹽河二百六十里般過
永豐壩渡黃河至老壩而船再易牛車運至套河
船行里許鈎損般過三壩入套河船十五里抵淮
所而船復再易由淮所掣驗畢復鈎損般入剝船
至烏沙河巡檢驗票或載入南河大船運至清江
浦由三牖三壩過洪澤湖或仍般堤過壩至武家

鹽運新志 卷之十一 二
墩般過湖船計自場至壩自壩至所由所入湖共
般五壩十損六易船勞費之數幾倍於鹽本其坐
困運本者二由場至壩每單引四百二十四斤分
貯四袋過河至老壩改捆成雙併引大包共八百
四十八斤至淮所復改捆成三併引大包每引外
加帶殘百斤連皮重千五百七十餘斤其改捆之
耗撒船戶工役之偷漏鹽斤已僅七折由所運岸
又將八折前此商力充物值賤船價皆實給猶可
獲利近日疲商專以多夾重斤虛加水腳爲事而
捆工得以藉口矣船戶得以售私矣岸夥得以隱

藏矣關津得以挾制矣其自耗者三前此口岸售
價易銀每銀一兩不過千錢近日有千五六百錢
者利不敷本於是攙和泥沙扣減斤兩以圖利鹽
劣秤短愈不足以敵私梟而反足以增官費其虧
折本利者四場鹽山積無商收買不得不透賣於
私岸鹽不至民難淡食亦不得不仰給於私自正
陽關以西皆爲蘆私所占以東皆爲場私所占北
商十七家僅存三四家歲運數萬引其滯岸各商
則皆棄店罷市逃避一空十年無課地方官慮督
銷干議則以缺鹽上請場官苦竈丁呼籲則又以

雲臺縣志 卷第十二
收鹽上請上官則亦惟嚴檄督催空文酬覆雖其
間亦有籌運道如嘉慶初改滁廬八岸歸江運者
而損壩之道如故久之而江運之困與湖運等亦
屢議調劑如運庫發銀借商收鹽而南商攤徵歸
欵者實則彼此瓜分積欠帑項數百萬近則南商
之困與北商等至若仿漢岸之例設總埠於正陽
革損壩之弊移運道於他所亦屢經籌議輒以私
梟捆工挾制恫喝築室道謀汔無成議道光十年
秋

天子念東南商民之困思變通釐法特

命 宮保陶公總督兩江兼管兩淮鹽政會同
欽差戶部尚書王公侍郎寶公議改綱運歸場竈起
課或設局收稅旋以事體重大先 奏章程十六
條裁浮費二百六十餘萬以蘇淮南之困並請俟
別籌淮北先剷除二壩以利運復發銀二十萬兩
官督商運以濟暢岸而額課尚缺大半乃議試行
設局收稅之法於淮北先委前運使王公鳳生前
淮揚道鄒公錫淳查勘會同署兩淮鹽運使俞公
籌辦甫有成議而王公調往湖北籌辦水利十二
年正月 奏委鄒公專司其事並檄 元淮
隨同查

辦先擬章程十二條減科則改運道裁規費嚴卡
巡主於招商而利運會 宮保防汛來清江同往
迎謁請示 宮保復親赴海州登雲臺之巔周覽
形勢並躬履場竈徧詢輿論知所議可行遂以五
月具 奏將淮北綱鹽所行四十一州縣內除江
運之安徽八州縣及暢岸十一州縣又與淮南引
地相錯之天長一縣仍畱商運外其餘湖運滯岸
安徽之鳳陽懷遠鳳臺靈璧阜陽潁上亳州太和
蒙城英山泗州盱眙五河河南之汝陽正陽上蔡
新蔡西平遂平息縣確山又江蘇食鹽近岸之山
陽清河桃源邳州宿遷睢寧贛榆沭陽海州安東
共三十一州縣均改行票招徠民販設局收稅得
旨允行是時羣議朋興或謂輕改成法一敗將不可
復或謂鉅萬稅課難責諸不知誰何之人或謂捆
工千百失業滋事或謂引梟入境則地方必擾聚
梟於湖則票鹽必劫且遠省商販未及周知近場
民竈聞風觀望乃委海州州判龔君照琪領運一
千五百引官爲倡導懲關役之勒索揭口岸之把
持於是人有所恃遠近輻輳至壩則利倍至關則
利倍至岸則利又倍晝夜捆運蒲包湧貴鹽艘銜

尾帆檣相望不四月請運二十餘萬引場鹽一掃全空是歲海州大祲飢民轉移傭值全活無算而口岸鹽淨價賤蘆私顆粒不行其販私鹽者皆轉而販票鹽梟化爲良鳳頰光壽鬪奪之案十減七八利國利民利商利竈萬口歡騰爲數百年所未有向之浮議阻撓者又思居奇壟斷始而認岸繼而認引又繼思分認暢岸甚且票鹽船擁集正陽關偶未銷售輒被岸商把持不許堆貯賤價勒買欲使票商代爲運鹽而坐收其利宮保洞燭其奸次年卽奏票鹽試行有效請將淮北畱商

暢岸安徽之壽州定遠六安霍山霍邱河南之信陽羅山光州光山固始商城十一州縣一律推廣改行票鹽於是商販愈衆而場產適缺加價爭售鹽值每引有貴至三兩者壩上轉售自五六兩至八兩有奇者正陽關轉售有自八兩至十二兩者產缺價貴仍奏銷三十萬引尙足以敵蘆私而有餘甚且加價預買明歲之鹽而場商亦樂收其值以修復廢產廣鋪新池於是板浦場修池五百餘面中正場之蒿子頭亦移鋪五百餘面合之三場舊池共四千六百餘面然預售過多而新池未

就收鹽無幾未足以還票販且有不及其半者其板浦場外四疇客池竈價昂至數倍垣商得不償本有負票價而逃亡者漸非歸局收賣之初議宮保復嚴檄禁止預賣於七月內截止錢糧而三場爭納者已四十八萬引合之青口則五十六萬餘引其歲終實運鹽出場者四十萬引次年除補還欠鹽及畱江運各鹽外其餘一切歸局由官收稅給鹽不得私相預賣而淮北之事始太定蓋三載之中屢生變局幾敗垂成賴宮保堅持定見乃克有功其艱如此至其章程大略則一曰課稅

淮北正額科則每引一兩五分一釐票鹽始行之初酌減錢糧三分之一又各衙門卡局官吏商役經費五錢二分又鹽價六錢四分每引共徵銀一兩八錢八分而經費有餘卽可以補錢糧之不足次年推廣暢岸卽奏復錢糧舊則而減經費一錢二分減鹽價四分共每引徵銀二兩五分一釐其後惟鹽價不由官發由局商自給竈戶議酌貼簽席人工三錢其餘毫不許增以輕本而招徠一曰局票板浦場設太平西臨二局臨興場設臨浦青口二局中正場設花垛一局皆於三場適中之

地各設局員秤掣并簽局商佐理其票蓋用鹽政
運司印由分司發場由場發局一紙三聯一爲票
根由場大使裁存申送運司一存分司備查一給
民販民販先具稟赴局局商領赴場官納稅填注
姓名籍貫引數及指銷州縣乃得捆運一日卡巡
於三場鹽河扼要之地分設三卡其運鹽河則卡
於大伊山薔薇河則卡於房山沫河則卡於吳家
集各委員駐劄抽驗鹽船每引四百斤爲四包自
十引至百引以上爲一票符者加鈐放行其不符
者以夾私論惟近場食鹽入州縣以一引起票海
州贛榆則百斤起票以便民食而革去老少籌鹽
名目以杜私販並派海州營弁七員兵百六十名
東海營弁四員兵百十名海州衙役六十名分汛
巡緝又委員別募巡役四十名總巡三場稽查各
卡透漏使私鹽盡歸稅課一日便民凡票鹽經場
局卡員層層稽察以後所過關津止許驗票毋得
查鹽其口岸州縣規費盡革止將商販所繳之票
申送運司逾期不繳卽爲廢紙其所請之岸鹽多
滯銷者許向所在州縣呈明改運他岸惟不得越
出行票四十二州縣之外他如船戶之偷攬匪徒

之搶劫胥役之勒索奸民之把持隨覺隨治令行
禁止千里肅然此四者皆票鹽之綱領而其尤要
則莫如改道不改捆之一事蓋淮北綱鹽疲累莫
如運道改包其始繁重之法原以杜私而防弊其
後止足以困官引而便私鹽故淮北課則雖輕而
每單引運至口岸成本總須十有餘兩利不償本
故官不敵私今票鹽不由損壩淮所舊道改抵王
營減壩渡河入湖且每包百斤出場更不改捆直
赴口岸至爲簡易除鹽價錢糧經費外加運費一
兩而至壩再加湖船水腳一兩而至正陽關成本

不過四兩有奇減於綱鹽大半故展轉稗販皆可
獲利足以減價而敵私且向日捆工皆移至減壩
過載受僱併得奏本販票利過其舊從無失業滋
事之人其後復有議移淮北監掣同知於王營減
壩增設科條者勢將復蹈綱鹽之舊弊宮保力
持中止故竊謂票鹽之興廢將來必以此爲樞要
焉元淮自十年春夏至海州商定章程七月卽奉
委專辦青口一局青口者地隸贛榆爲海船匯泊
之所有唐生興莊柘汪三疇鹽池共五百餘面舊
設興莊場大使其後裁歸臨興場孤懸海角遂同

化外專賣沿海漁船醃切透私旁侵山東各境例
 設食鹽店額銷僅三百單引從無繳庫初鄒公之
 查辦淮北票鹽也止以歲行十萬引為期亦以青
 口懸隔鞭長莫及且土池鹽劣商販不前擬置之
 不問元淮恐其有累全局自請查勘以三月末渡
 海親歷三疇徧詢池竈灘高者掘海鹹泉鹽色甚
 潔近海者引潮積滷曬掃尤旺歲產三四十萬石
 未便置之斧劃既詳稟情形遂奉 宮保札委有
 相機妥辦不為遙制之語七月復渡海傳各竈長
 諭以大憲改法之意始猶為食店革商謠惑疑元

淮網利一兩月後咸知無他轉相告語蟹船水販
 漸集而外商尚無問津者乃稟請一律行票由內
 河行走於是商販大集是冬即行萬餘引明春解
 稅課赴揚暫假回蘇三月再至則土豪放價爭收
 竈戶居奇鹽價驟貴數倍每引至二千七八百錢
 且有預賣脫逃大非鹽歸官局之初制乃創歸團
 挂號令民販自稽曬掃之法每疇各擇適中高阜
 築立公團數所令竈戶將所掃之鹽逐日堆入其
 中不得私貯每疇慎選團長一人稽報鹽數領價
 實給不許私扣其民販赴局納稅先給小票持赴

某曠收鹽每號百引每人一號每十號爲一輩合力查鹽計數均分乃稟局掣摺給票出運每五十號爲一輪前番摺畢後番繼之民販不親赴稽鹽者三日卽銷其號還其銀至於本地食鹽漁船醃切則提十分之一仍許納稅請領百斤至九引小票一律經官掣摺不得逾額於是積弊一空是年青口三曠卽暢銷五萬餘引至十四年而求號者愈衆鹽不敷販又創掣簽定號之法復暢銷九萬餘引時海州三場商販自爲交易昂價脫空者大半場商競倡不可歸局之說牢不可破究以青口

歸團章程在前無可藉口以宮保據此以拒浮議飭三場仿青口之法一律歸局而奏案始定故竊謂票鹽之興廢又必以歸局不歸局爲其樞要焉夫鹽無官私之異則私盡爲官其理至明也弊除則利自與本輕則末自裕其事至易見也然微聖天子知人善任裁鹽政歸總督朝奏夕可則變法改道之事必不能創厥始微宮保能宣

上德意變通宜民集思廣益則不能善厥中且非堅持定見不惑浮議不壅下情則不能成厥終經綸將至有開必先淮北者淮南之先機而兩淮者又

天下鹽法之先機也 元淮 幸以 小臣 奔走從事備
悉本末用敢拜手記之以備觀采焉

嘗謂鹽法之衰旺視乎利弊之重輕必知利之
所以利而後能立法必知弊之所由弊而後能
行法除弊之難難於興利者什倍方淮北綱法
之弊也課缺岸懸丁逃竈餒私梟縱橫官商束
手不但以利爲利者無所得利卽以弊爲利者
亦無所用其弊譬之疾入膏肓忽逢秦扁投以
刀圭得效固佳卽不效亦不過仍歸於盡耳以
故票法試行之初人雖尼之而不甚力迨票行

已效弊逐利生日增一日而以弊爲利之徒望
壟先登必欲使利盡爲弊以填其蠹壑而良法
美意之幾於中壞不顧也雖補苴苟完亦云倖
矣不得不剴切敷陳以灼戒將來語長心鄭重
深有望於後之同志者謹別敘爲票鹽下篇

票鹽 下

淮北之疲久矣自 宮保制府陶公改行票引 奏
定章程遂轉衰爲盛查票引之盛莫盛於道光十
三十四兩年而奉行者未能悉臻盡善故利興而
弊亦潛滋綜其受病之源約有五端一則不禁場

商預賣也壬辰癸巳以後各場積廩盡空民販艱
於得鹽往往預給鹽價定買來歲之引猾商壟斷
居奇第以垣名圖記印發空票期以來年付捆每
引得銀一二兩不等實則其池所掃一年不過千
引者預賣輒踰萬引幾十數倍於曬額甚或並無
池產藉賣鹽之價旋請補鋪赤日在天鹹潮在海
磚埴在窰何異諺所稱指山賣磨乎民販初至者
多爲所誑迨來年無鹽應捆則跳身匿影控案纍
纍而販本被騙者衆矣一則客池不行歸團之法
也歸團之法剗自青口無局商無場商分立團長

令民與竈交易最無弊混行之可久板浦三場以
其不利於垣商也百計沮之西臨花塍二局共八
疇均係竈戶客池昔綱引盛時原有場商世業請
旗開垣收竈售運白綱商積疲垣商久經歇業竈
丁以賣私爲生計顧每遇發帑收鹽率皆本池
領價自有陳廩可抵無庸收買一有鹽價到場官
商層層剝扣各肥己橐於望梅窮竈毫無所濟自
票法行而地匪青皮衙門胥役均購遠年廢棄垣
照報名請旗一旗所費不過數金公然自命垣商
遂仿商例以收竈鹽擡貴值以售民販掃鹽者竈

丁納課者民販此等垣商不竈不販無產無貲橫
插於中白手取利甚且外脫販鹽內欠丁價其惡
較本池之垣商爲尤甚西臨花塚所請旗名多至
三四百面而販本被騙者又重矣一則溢收錢糧
也淮北額引不足三十萬當票法初行雖未立限
制然祇就現鹽售運不致拖欠迨預賣之弊興而
收稅每逾定額歸於下年補摺欠鹽浸多及十四
年夏 宮保制府陶公洞悉其弊銳意整飭嚴檄
總辦分司必遵原 奏章程歸局買運於是分司
始出示勒限收稅以七月二十日爲期又展至中

秋日是年三場共收四十九萬餘引而青口不預
焉現鹽付摺之外無鹽可運空納課稅者凡二十
一萬數千引其鹽價每引仍係一兩五六錢至七
八錢不等而販本被佔數十萬金當販多鹽少之
時以先摺爲利鹽質好醜包斤短缺皆不遑計運
出之鹽多雜泥土或黑碎寒餒壩價以是斗落每
包祇七八錢折閱過半而販始大虧不可支矣一
則場竈餘鹽不行收買也雙金閘閉陸行之運腳
甚重販多停摺垣商無貲遂不收竈是歲秋冬久
晴曬掃不減於旺夏透私漸多皆以舊票重運官

私莫分海州之新壩龍苴阿湖房山上坊湯家溝
沐陽之馬廠唐溝均有私巢窩囤轉販一仿票鹽
包式故西壩有馬廠鹽新壩鹽等名色其鹽粒大
色潔包筋又重較票引尤暢場私蟻赴時場下不
肯請欵收竈又因臘正兩月冰凍停摺請將武卡
弁兵暫撤節省經費千金兵役本與臬通藉口裁
汰轉而放私凡他月透漏亦皆諉諸撤卡時自冬
徂春漏私不可數計壩積如山民販以脫貨搶本
爲幸而票引益滯矣一則十五年歸局掛號不行
驗貨之法也歸局必須掛號不掛號則先後無可

稽掛號必須驗貨不驗貨則虛冒無可考鹽法列
於食貨本屬商賈經營必有本始可求利世之黠
者巧於假借惟白鏹朱提不能咄嗟立辦雖有智
慧亦難以空空稱妙手也奈何始行歸局准掛號
而不驗貨意在體卹商販然場額有定不得不預
爲限制乃分局派引期如額而止先收板浦場太
平局號本以八萬引爲度乃來者數百人號稱數
千其實廝養賤工居其大半各以錢十二文買印
就號本一扣每人十餘本多者至百餘本每號載
一百引羣擁入分司署始猶挨次投遞繼則喧呶

叫囂手本紛落如雨不得已儘數全收合計已二千二百五十六號矣場產不能給乃爲折扣之法太平局四折每百作四十引臨浦花塚皆二折而西臨客池及中興富民二疇不在此內是時空名冒號者多而真實民販無所得號轉從冒號者買之每一號十餘千或四五千以所掣商垣之殷乏爲號價之高下游猾莠民徒手得財有一日驟致百金者其後無號可買又因籤號零星百引之鹽二折者卽須五處收捌商情不便請託行焉而拏皮與拉皮者坐收奇贏民販成本更因之加重矣

具此五失加以緝私額項梟匪冒票公行被獲則

尋覓故票反以誣拿票鹽爲緝捕者罪兵役卻步

商販大沮先是

元淮

於十四年七月奉委署贛榆

縣簾缺至冬回胸仍幫辦總局事十五年二月總

巡龔君

照琪

同寓胸陽目擊敗壞情形必須先杜

私路爰約同周厯各卡沿途多有盤獲遂由三尖子牛皮古寨至王家營徧查西壩各棧計二十二家堆鹽十六萬八千七百八十八包起獲私鹽五百餘包時各棧聞信之先渡黃入湖船者已數萬包又偕龔君渡河至順清河稽查過載各棧存鹽

一萬九千五百二十包其已上湖船者不便紛擾因思票引自場至壩惟局員一掣卡員一驗此外別無稽查以致私販乘隙必須另籌防範會稟制府大指言西壩順清河二處爲票鹽總匯渡黃入湖之要區前議移淮北監掣同知於西壩專司驗掣誠恐多設一官卽多一層繁擾或增票商之累然竟毫無稽考又難杜影射之端酌中定議則設官不若添派委員較爲得力蓋委員與商人勢分不甚懸遠下情易達且每年更換不暇爲營私久踞之計以現在情形而論亟應仿照綱鹽皮票

截角之法票鹽出場局員掣驗時截去大票平聲第一角卡員抽驗時截去大票上聲第二角西壩添委文員駐劄於票鹽到壩進棧時驗票點包截去去聲第三角又於順清河添委文員駐劄於票鹽渡黃過隄上船時驗票點包截去入聲第四角則還票重運之害可祛謹先將西壩商票四千四百十六張截第三角訖又將順清河商票五百五十一張截第四角訖一面信致場局各卡照辦先就在場委員前來接辦庶稽察周密不誤事機蒙如稟准行梟匪始有忌憚是年五月 宮保以督

催重漕駐節袁江

元淮

謁見後卽請咨引

見九月旋抵金陵將赴無錫本任時俞都轉亦在會

垣

宮保諭以淮北票務令

元淮

仍赴板浦勾當

堅辭不允旋奉檄署理海州分司再稟懇辭仍不
准遂抵板浦分司童君委署淮南監掣專待交印
時 宮保入

覲已抵清江偕童君馳赴漁溝同謁見於行館奉諭
早日接印悉心整頓蓋前稟已奉駁行司矣乃於
仲冬旣望視事溯自道光十一年委勘淮北情形
十二年試行票法嗣赴青口十四年委管大伊山

卡旋檄幫辦總局至此次凡四莅板浦與票鹽之

事若相繫維者然盱衡時艱倍深惕慄時併大府

憂淮北甚揚州流言以爲不可收拾

元淮

受恩深

重復因襄理票鹽獲優擢不敢自爲計接任之始

未知何從下手細加體察略得致病之由亟宜整

理者亦有五端曰停止陸運也清釐池產也勒歇

私棧也按引派鹽也嚴緝場私也乃縷析稟於

制府都轉其略曰本年淮北票鹽產多銷滯壩岸

價低販本折閱來年課稅恐難踴躍急應預籌疏

通之法從前改票之初鹽潔價廉歸局買運是以

商販樂趨迨後場池把持擡價預賣不遵定章私
相交易以致成本加重販累日增及奉檄整飭重
歸局捆而上年溢收錢糧二十一萬餘引貲本既
多估摺兼之私充銷滯西壩順清河積壓十餘萬
引每包市價七八錢虧折尤甚穀賤傷農鹽賤傷
販不可不早爲籌策爲今之計當以疏通岸引爲
第一要著若欲壩岸速銷必須場鹽少出查淮北
綱食各岸每年額行二十九萬六千九百八十四
引自道光十二年試行票法五月開局收稅當年
卽運行二十四萬二千六百五十七引十三年行
三十二萬七百八十四引十四年行五十八萬九
千三百二十一引十五年行三十六萬六千六百
九引內有青口二十四萬四千五百一引統計四
年共運一百五十一萬九千三百七十三引而江
運八岸天長一縣歸於官運商運者尙不在此數
內幾於一年行兩綱之鹽無論私鹽未能盡絕卽
就已捆運岸之引而計則壅滯之原實由鹽多所
致舊販鹽壓本捆不能轉輸新販卽有續運亦復
運而不銷愈積愈多不能不跌價爭售甚至有售
無受商販徬徨大有渙散之勢夫緩則治本急則

治標堵緝場私使無透漏清丈池面使無溢產歸局捆運使無擡價此治本之道也而大要總以疏銷岸鹽爲治標之急務現奉委員來場勘定池面又專委總巡堵緝私鹽場下諸弊自可漸次清釐惟票鹽陸運一事尤爲官私混雜易滋影射必應禁止查票鹽初行之時因岸食缺少准其水陸擇便行走原屬一時權宜今壩岸壅積如山尙復何煩接濟本年春月私鹽乘隙而出藉故票重運以致官引不行經元淮會同總巡委員周歷踏緝稟立截角章程梟徒稍知斂迹而陸運仍多混淆巡

役難於徧詰應請將陸運一概停止以清界限只許由板浦鹽河舟運過大伊山以達西壩其吳家集馬厰三尖子新安鎮費家窪安東縣等處陸路車運一併禁止違者無論有票無票均以私論官引旣停凡有陸運皆係私鹽海屬地勢平行二三十里內一覽而盡巡緝易於查拿而徐邳山東之遊匪藉充車頭結黨滋擾者亦可潛消其患不致復蹈工損蟠踞之習票鹽旣歸大伊山經行其吳家集薔薇河兩卡專事堵緝不得驗放船隻以歸畫一至正陽關順清河等處亦有應行整頓之事

查淮北之有正陽關猶淮南之有漢口爲票鹽渡湖總匯之所近聞該處地匪假開錢店私設鹽行把持貿易另置重租私秤外加錫牌並用手扯壓每官引百觔不及八折不許水販與票商見面價值隨其高下賒欠拖騙無所不至商販受累無窮應請頒發通諭嚴行禁革併札飭鳳陽府暨正陽關通判訪拿究治又西壩順清河爲票鹽出場總埠試行之初卽奉 宮保制憲檄飭不准設立鹽行名目慮其把持爭佔只准開設棧房聽民販隨意堆貯交易甚便並無順清河設棧之事本年春月吳家集三尖子等路私鹽透漏欲避西壩而就湖船自在彼發賣因而票販亦往爭售始有棧房馴至由安東渡黃鹽船徑泊順清河轉將西壩繞越只持大票送委員截角其有無夾帶無從過問弊竇叢生且其地窪狹左湖右河淹消可慮又人情刁詐開棧者多係本地游匪勾串湖船先兌鹽上船然後交價動輒脫空中飽爲害甚鉅應請申明舊章嗣後票鹽俱在西壩交易其順清河止許過載不准堆棧所有私開各棧一概勒歇並飭清河縣及順清河委員隨時稽查遇有私棧立時

拆毀以淨根株再本年重刊票鹽簡明章程內定
限到岸一條有逾期不繳票作廢紙鹽以私論十
二字原爲故票護私而設但雙金開開放每年不
過一二次爲時甚暫票鹽多有起棧待聞者勢不
能盡於限內到岸且有鹽未出場而限期已滿者
到岸繳票轉啟口岸各衙門胥役訛索之端應請
一併出示通諭並行知皖豫銷引各州縣嗣後票
鹽到岸總以順清河委員截第四角之日起扣倘
再逾期根查究辦庶不致迫促其雙金開啟閉之
期亦請檄飭中河廳於十日之前先行移會海州
分司以便傳諭各商販按時起運可免中途阻攔
之患矣時鳳宮保陶公入

覲巡撫大中丞文林公攝督篆奉批如稟准行憲檄
甫下號令風行兩月之間成效已著西壩包價頓
長又奉檄飭壩河委員將存貯進棧出棧鹽數及
鹽價長落按旬摺報自場至卡自壩至關聲息相
通間有蠹弊易於發覺正月截數壩棧存鹽六十
餘萬包至五月而掃數全銷每包價至一兩三錢
上年粒碎色黑之鹽無人問價者亦皆銷盡轉滯
爲暢商販輻輳而清丈池面剷除溢鋪之事亦適

告竣歷來清丈之案未能認真上年制府委候
補通判儀君啟侗布政司理問陳君丙都轉委候
補運判張君學襄吳君崇煦分丈三場淮北定例
每池以磚三百片爲一引磚長八寸濶半之計九
十六方尺其後以磚片大小參差且艱於稽算改
以方丈爲一引載在鹽法志較之計磚每引多出
四方尺今以縣印連接五印爲一尺三場一律於
十五年臘月丈畢緣冰雪地凍未能剗掘今春二
月又委場局各員分投覆丈各按完納折價錢糧
之數以定剗畱計剗毀溢鋪者板浦一百五十三
面計四千九百二十八引九分臨興一百七十二
面半計八千五百三十九引九分惟中正廢引過
多除中富二疇新鋪之池撥抵外尙餘無着八千
餘引而土池則一概犁毀每丁給與印照上載池
面丈尺完糧引額坐落疇圩每年二月清丈一次
如有報廢移鋪隨時勘丈務與印照相符而百餘
年牽混不清之池面始得池引符合有可查考又
將西臨花塚二局客池悉照青口歸團稽掃而本
池則堅持歸局之法教令旣行場政一變蓋自陸
運停而運道一則舊票護私之弊除而透漏稀矣

禁歇順清河私棧則地棍串詐夾私搶跌之弊除而市價一矣本池歸局民販稟官認買則擡價索費之弊除而成本輕矣客池歸團稽掃則游手冒垣指廩脫騙預買虛賣之弊除而訟牘簡矣清丈池面剗毀溢鋪一准折價錢糧以定額則私鋪放大之弊除而產鹽始有稽覈矣以一場全年鹽額攤派於各池按池定引按引定鹽按冊派數按數計額則售鹽均有定則曬掃不致過多而鄰境不能藉口侵灌矣自此次實力整頓之後積弊全除商竈咸遵約束西壩積引盡空淮南之侵灌自免

自十六年二月初六日開局收稅起至六月杪止派定二十二萬引之數早已滿額販來絡繹以到遲爲悔官收餘鹽三萬餘引亦俱買運無剩壩岸疏暢大有起色此皆恪守大府章程而以實心實力行之期以上紓厘念而元淮亦藉可釋重負於淮北矣惟是法以人立弊隨利生疲敝之機實伏於暢盛之時善後之策尤宜預講目前場下壩上諸臻妥協而緝私實爲最急之務淮北曬溷成鹽較之盤鏹煎熬工本懸殊出鹽最易最旺今雖限以定制然一年所產何止五六十萬引歲額所

行祇及其半官不准賣則商不肯收竈戶以曬掃
爲活斷不能棄池鹽不掃卽難保其不潛透濟臬
私從竈出緝應先竈現今水陸各隘俱已嚴密自
東海趙都司以疏懈被劾營伍惕懼巡堵頗力近
於黃河之佃湖添設委員駐緝則轉海之私似可
禁遏又於雙金閘啟放之時委員駐劄新安鎮會
同營弁盤查葦蕩料船則夾帶之私亦可漸少其
臘正兩月武卡弁兵薪飯稟復舊制按月關支又
將裁減總巡之巡役二十名亦還原額卡弁無可
推諉巡緝不敢鬆勁但堵緝雖嚴究竟鹽無出路

終非正本清源之道必須南商借運北鹽庶爲兩
得以北鹽之有餘濟南鹽之不足在彼可以獲利
在此可以疏銷誠南北兩利之道曾於十四年五
月籌議及此稟蒙 宮保制府於六月二十八日
入 奏奉

旨依議欽此欽遵在案而南商遲疑不決其遲疑之
故或以創始爲難或以南岸未食北鹽銷路不合
爲慮其實由場至壩一水可通不比從前五剝十
損之艱一切捆運悉照江運辦理原包到岸無須
改重更爲簡捷而銷路不合之說尤爲牽強天下

之口有同嗜何分南北且南鹽出於煎熬味多帶苦北鹽曬掃天成自然鮮厚其優劣已不問可知况淮北江運各岸本與淮南食岸毘連每以侵灌爲詞如果銷路不合何以又能侵灌矛盾之談不攻自破今南商多因場價昂貴虧折本銀若借運之路一通則南鹽立賤北鹽立銷一舉兩得實票法之轉關亦兩淮全局所繫也此外則江運各岸亦應籌及淮北奏銷連帶殘以三十七萬五千餘引爲額今三場限以二十二萬係扣除江運八州縣及天長一縣之額歸於南商認運以自固淮南藩籬今南商旣推諉不辦不得已而委員官運自道光十四年奉文購備江運五萬引至今兩載僅據委員運壩者二萬餘引而口岸則片引未到墊用庫項已數萬金帑本旣鉅勢成佔擱口岸虛懸民虞茹淡斷非持久之法且奏銷之數不能因江運滯銷而特有所減商運短額勢必以票鹽之贏彌補其缺然必票引有溢方可挹彼注茲去歲板浦三場祇行二十七萬餘引加以青口九萬仍短一萬餘引卽應以從前溢引彌抵若如江運虛佔票額而又不准改歸民販其勢漸同無著上

年不運已空八萬引本年又不運卽空十六萬引
年復一年伊於胡底必須嚴飭南商設法趕運或
來場下或在西壩按年按額採買疏銷不得任其
推諉致使淮北鹽無去路此尤事之不容緩者至
於票課每年數十萬兩分司運判或宜改爲運同
運副以重職守添設庫大使以專責成亦似應次
第舉行也夫除弊更難於興利善後更難於創始
興利者如平地造室財用旣足棟梁榱桷可以隨
材取用堂軒庭廡可以度地施工下至臺榭池沼
猶可以餘力爲遊觀之所無所牽制也至於除弊

如修葺敗屋堂構雖存蟻蛀中空牆積礎缺斧斤
無可施其巧拆毀重修力旣有不能抽梁換柱勢
亦有未可財用久乏襍被待居計惟有塗飾補苴
苟且一時而已然則淮北善後之艱倍於創始必
知弊之所由去而後知利之所由興行以實力持
以實心以無負 大府之良法美意是所望於後
之君子

之盛乎

以實心以無負

收獲之退由去

尚且一翻而互

亦未可視用八

無可識其四

收於草烟室堂

雲臺新志卷第十三

靈植

謹案宋徐仲車東海大松詩以為混沌以來神物護持又以為德若有容才若有餘而推本於陰陽山海之氣是大松之為靈昭昭非僅若尋常之覺花忍草點綴琳宮也自仲車先生至今又七百年矣道光壬辰夏兩江總督

宮保尚書陶公題為蟠龍丈人揭石其旁以詩張之海內名流屬和者數十家此松托根名山閱世久而始有此奇遇松之靈歟抑山之靈歟

因仿元劉大彬茅山志例立靈植門

東海大松

江南通志在州東大海中相傳三代時物案康熙四十年以前雲臺本在海中故通志云然雲臺古松甚多顧志漏而不載崔志祇載松谿之睡松以爲千餘年物其他亦皆闕如今案龍松礪之蟠龍松卽徐仲車所詠東海大松

宮保陶公所題蟠龍丈人也屏竹社廟門外一松措牆分蔭兩枝上下如扇人稱爲扇面松廟後一松臥石上作盤旋勢廟西坡下亦有臥松較廟後

者稍遜廟後巖間臥松之上復有植立一松亦具別致是爲屏竹社松九龍礪大松孤生礪中其下有僧塔三四是爲九龍礪松此外尙有東竹園西北一松雙枝連生自根至顛齊榮并翠園後一松形如拄杖俗呼拐杖松又九龍橋畔二松并稱奇古詳見元淮雲臺十一松記載勝蹟門而以龍松礪之蟠龍松爲最奇最古今稱蟠龍丈人云

宋徐積東海大松節孝集

東海有物天下雄萬靈勳力生奇松天精地粹萃其下滄溟百道來相通一根直去穿九泉一

根斜插鯨魚淵遠者壓折巨鼇背近者倒纏山
根偏小枝可就千鈞弩大者可挂萬斛鐘惟有
老幹苦難狀呂光營外堆元龍身披北帝雄犀
甲虎賁聯臂圍不匝無計都將大地遮有心盡
把浮雲刷樛枝入地旋復上怪怪奇奇非一狀
谷陵相變任古今土木兩行專王相列幟空遺
渭川壘犒師畱得楊隋帳元駒來撼亭亭蓋綠
魚飛入滄浪漾最是半霄風雨聲山妖走盡川
魅驚十萬爭揮鐵槊騎百千齊鬪黑旗兵有時
海面波濤小一部仙韶下蓬島殘聲逐水散鳴

琴遺響穿雲聚啼鳥混沌以來凡幾朝清氣濁
氣渾未消獨葉聳來新蓋鳳雙柯合處舊藏蛟
其本既異其事殊德若有容材有餘大鵬斥鷃
皆可居相忘似有江湖魚美哉此木真不凡能
以智免斧斤間過盡工師無所用莊周應作不
材看大松大松如此奇方輿圖蓋不可知陰陽
山海氣合離不然神物相護持

國朝陶澍蟠龍丈人歌

有序
石刻

雲臺山三元宮西澗有松一株最奇漱石枕
流蔭滿一山相傳三代以上物也其松高可

五尺許圍倍之軀確甚而頂平無所見見二
幹其北幹鬚髯拂地行行且止忽化爲常山
蛇作一大圍盤綴尾如連環然其南幹崛起
穹窿如虹梁大數斗鱗甲瑤瓏力辟萬夫忽
袒而露其臂再接再厲重茁二枝一東向如
拜舞狀跌宕自喜若將飲於溪而昂於霄無
能羈勒之者一南出而西顧亭亭然如承露
之盤擎以仙人之掌其上結瑤臺瑤島層層
掩映而蜃樓虬戶若可仰數焉至其飛髯走
鬣枝撐節附面目殊特殆無分寸雷同者而

回環曲折遙遙相應忽起忽落乍東乍西大
力盤旋則又風雨離合不可湊泊按之仍一
氣呵成不能不別其爲株爲幹爲柯葉也余
行天下山水窟中所見多矣未有如此松之
天矯離奇變化不可思議者驚喜之下就呼
爲蟠龍丈人揭石其旁而聲之以詩庶爲茲
山發潛德之光焉道光十二年壬辰四月三
十六日

鬱洲之山濱海東有松鬱律蟠其中蟠天蟠地
蟠不已勢若老龍拔崖起龍老頰且皴此松尤

鱗鱗龍老牙而角此松殊嶽嶽上蟠碧落下蟠
泉晴空白日生寒煙前蟠欲飛後蟠舞颯颯周
旋中風雨問松自何年燭龍未出扶桑前蟠桃
三千年一熟此松卑之猶晚族蟠李萬葉森中
州此松視之亦部婁蒼然古心復古色海屋近
鄰龍伯國文章不露世已驚之而漫作誰能刻
南陽抱膝吟東海繩牀心子魚握躡何足道捧
腹來此荒山岑不羨大夫封豈利大人見在田
在天躍亦潛泰山頂上窺真面我今爲爾號號
爾曰丈人卽松卽龍龍卽丈猶龍老子何其神

不然十八公歲寒友蒼髯客支離叟爾名多矣
於丈人乎何有袍笏雖無米老呼洞巖合遣靈
威守重爲告曰龍之德也奇松之德也常以不
常目有常是謂至柔馳騁天下之至剛世間不
乏沈諸梁勿投時好爲虛張噫嘻哉松蟠蟠龍
矯矯伏處能無變化心長材肯作輪囷老待爾
深山行雨歸余亦田間思荷蓀

張井蟠龍丈人歌

印心石
屋詩薈

我聞拒格之松日月所出入直與元氣通呼吸
亘古獨立大荒中世人何曾見鍼粒又聞負歛

巖前松龍鱗半空天矯如有神星幢雲蓋儼侍
 從仙靈荒忽難具陳何如東海大松近郊甸撐
 空臥波人共見劫灰兵燹幾推排此松蒼顏終
 不變我未見此松誦詩復披圖師禹門刺乍覺
史處有圖寒風謾謾生坐隅奇姿譎態不可以思議縱有
 妙手難描摹松身拳曲才五尺平分兩幹各奇
 絕一幹橫走學長虹勢欲東窺尾閭泄舒肱探
 爪似與驪龍爭瘦骨枯纏萬年鐵忽然誇多鬪
 靡怒發千萬枝盤鬱玲瓏互糾結其一下趨忽
 上擬一分兩株逞恢詭俄屈右臂如彎弓如柳

三眠更三起又如常山之蛇擊其中首尾回環
 相角犄一松幻就百龍身遊戲神通乃至此吁
 嗟乎此松之奇天下無大如山河分兩戒細者
 鬚鬣瓔珞珠蜿蜒詰曲無相不具足怖伏鯨虬
 奔天吳贈以蟠龍名奉之丈人號風過掀髯應
 一笑借問丈人年依稀記在商周前應是大禹
 當年治水驅龍走一龍偃蹇不肯受作使風雨
 直到海東頭蛻形化作支離叟宇內豔說黃山
 松最奇一株稱臥龍田盤山中多偃蓋每邀
 龍輦誇遭逢此皆蒼古世無比莫與丈人論甲子洞

庭龍威尚恐難肩隨穆墜羸封雲初耳噫吁嘻
古稱壽考多不材似爾變化何雄哉蒼生霖雨
有人在偶貪高臥非衰墮君不見海濱昨夜風
雷厲丈人又作拏雲勢

陳文述蟠龍丈人歌

印心石屋詩薈

君不見石丈人大呼袍笏拜米顛又不見松丈
人大揮翰墨題詩仙丈人生何代或云盤古之
後三皇前丈人生何地乃在三元宮畔蒼梧巔
蒼梧南海來幾年大松東海世已傳蒼梧化龍
龍已去松也龍蟠此間住上蟠枝葉下蟠根根

夾石稜無覓處蟠之又蟠松翠重松花灑徧千
芙蓉秦封讓爾作前輩唐槐漢柏俯視皆兒童
下蟠日深上蟠茂海內無如此松壽空同元鶴
故人來偃蓋高鳴響連岫我昔東行上岱宗天
門親禮丈人峰承蜩已作偃僕態乞傍蟠龍學
臥龍

陳文述蟠龍丈人歌效印心石屋詩體

印心石屋詩薈

世間奇事那有此海上山浮滄而止世間古物
那有此山中樹老長不死君不見東海之山有
大松松形似龍名亦龍松蟠亦與蟠龍同入地

深透出地雄出地即橫橫即縱不稱為梁與為棟香楠文梓世儘多大厦何須此材用節目磔砢鱗之而東枝一曲蟠西枝攬拏遊戲無不奇松身化龍松不知飛龍在天松無翼見龍在田松無力九四潛龍占勿用任彼風雷與霜雪有桃源之漁郎云五柳之後身入茲山而登眺愛茲松之輪囷呼以丈人銘以碑石騫樹為賓樽桑為客賦三百之風詩括五千之道德宮保原唱至柔馳騁天下之至剛道德經精義也謂余詩之孔嘉宜頡頏乎太白宮保謂余前爰長吟於高詠謂宮保原唱深有詩神似太白

感於余衷居幼安於海外臥諸葛於隆中重為告曰松兮松兮木之公兮龍兮龍兮鱗之宗兮伴君以襄陽之奇石兮配君以岱頂之高峰乞茯苓於龍藏兮採琥珀於龍宮跨昔年之黃鶴兮尋君家之赤松逐浮雲而上下兮期遨遊乎鴻濛

齊彥槐蟠龍丈人歌印心石屋詩薈

天有丈人星地有丈人峰丈人變化不可測遊戲幻作東海龍怪他之而鱗甲左拏右攬飛不起誰知乃是海山萬古蒼蒼松松葉能教四山

雲臺新志 卷第十三
碧松身偃蹇，裁五尺大，涵天地小如蠶，除卻神龍無此力。雄龍昂首欲飛去，雌龍掉尾還畱住。雄不能飛，雄者怒，伸牙舞爪出雲霧。雌不能畱，雌者懼，百折千迴攔道路。兩龍纏繞合一龍，海風吹之化爲樹。上蟠不到九重天，下蟠應徹九重泉。蟠來蟠去知幾年，拗金屬鐵無其堅。或云虞帝南巡，手所植，或云防風骨節橫山巔。荒唐之談紛紛置勿辨，斷自洪荒以後三代前。怪怪奇奇說不出，天生一枝畫龍筆。丹青難畫畫，以詩稱曰：丈人稱絕奇，漫呼袍笏學顛拜，且停杯。

觴一問之丈人，丈人爾何用，規矩繩墨皆不中。謂爾爲龍，旣不能與世作霖雨，謂爾爲松，又不能爲國作梁棟。徒抱磊砢輪囷形，公輸屏棄匠石驚。有時自發鸞鳳響，空山寂寞何人聽。丈人默無言，雲裏掀髯笑。商霖周榦自有人焉，用支離貢，廊廟贈爾丈人號，榮於大夫封尊爾丈人行傳。與儒林同華陽大仙，旣識爾任爾嘯雨吟。清風百千萬劫爲爾壽，管領十洲三島青芙蓉。南陽臥龍臥復起，何如丈人屈曲深山裏。我亦天田農，丈人呼龍耕煙種松子。

謝元淮蟠龍丈人歌

石刻

造化之奇無不有偏於樹木鍾靈壽郁洲山峙
東海隅中有龍松狀奇醜仙根入地蟄九泉鐵
幹擎雲駭飛走下窺絕壑俯崕呀上倚崩巖笑
培塿拔地三尺分雙楹橫空天矯行衙衙南向
一枝得天厚之而鱗爪紛騰拏面面殊形畫不
到坐令韋偃長咨嗟其北出者尤奇絕著地忽
起旋盤折奮鬣回頭顧本根蜿蜒頓覺全身活
松兮龍兮渾莫分深山萬古蟠冰雪尚書行邊
到雲臺輕輿擁導躋崔嵬澗濱忽值蒼髯叟一

見驚嘆非凡材下拜擬同米顛石佳名遂並焦

山梅

焦山有梅
龍生孫

自有詩篇凌鮑謝還抽毫簡授

鄒枚

謂公眉
觀察

山精走匿山靈舞光芒照耀瓊臺

隈世間萬物各殊遇何止遭逢有早暮豈無千
尺棟梁材寂寞荒岡飽霜露不逢匠石徒輪囷
拉雜摧燒誰愛護茲松晚得丈人稱朝槿焉能
知其故秦皇當日登岱宗五株齊受大夫封迴
鞭東指海神懾長鯨飲羽滄波紅丈人此時追
四皓避地東溘爲潛蹤羸顛劉蹶幾千載至今
煙靄埋青峰未肯干霄露鱗鬣何意一旦當吟

筇一詩一碣表幽隱卻羨山中十八公嗚呼人生但得一知己臥龍端為英雄使勿學昌黎木居士輕示禍福招謗訾倘逢大旱望甘霖或應強為蒼生起

許喬林蟠龍丈人歌

有序印心石屋詩藹

雲臺西澗有古松輪囷連蜷別饒奇致畢宏韋偃所不能繪者傳為三代以上物宋徐節孝賦東海大松者是也道光壬辰孟夏兩江

制府

宮保尚書長沙陶公親題蟠龍丈人四字勒

諸貞石并作歌以傳之洵此松曠世之奇遇矣謹賦此詩

龍乎非龍松耶松詩筆如龍松亦龍丈乃在此輩行古不潛不躍東瀛東作其之而簇寒碧澤懼安羨十八公都洲一蟠四千歲後天不老開鴻濛亞枝蜷曲龍行空衙衙掉尾搏桑紅渴飲西澗垂晴虹駢柯聳秀迎高春承蜩抱甕殊龍鍾俯瞰萬朶青芙蓉或如連環或袒臂箭蔘四蔭何紛溶巨靈高掌倥佗笑華嚴樓閣飛玲瓏貫四時能不改色支離古貌偏為容風作龍吟

雪龍臥錦苔攢甲霜團鬢化為龍樹棲琳宮寸
 鱗尺爪無一同不落窠臼超樊籠磔柯多節奇
 而庸道光壬辰夏四月長沙少保登青峰擎天
 拄日結遐契羲皇以上尋仙蹤峽山老人例可
 比鄧林封拜珪翦桐與丈人遊非世法嘉名肇
 錫冰銜崇大書題石墨彩融月姿煙格筆吐鋒
 譽以蟠龍詩滿筓此詩榮於九級封泰山五大夫松在秦
爵為第九級龍蟠乃見松神通文心善蟠蟠愈工三
 停九似筆力雄造化在手心矩從惟妙惟肖天
 讓功丈人之吉龍德中文人之壽歌生崧難馴

雲臺

龍性欣遭逢我如七松處士窮撫松盤桓吟秋
 金蛩驪珠欲探後唱喁天龍噓雲雲生胸非公不
 能傳此松松名蟠龍詩猶龍

秦台

謝元淮重訪蟠龍丈人養默山房詩藁

雲臺多古松丈人吾老友未訪十八公先尋支
 離叟遙見已欣然青青意良厚摩挲復盤桓與
 我周旋久不侔處士梅合並先生柳嘉名荷品
 題蛟鬣勢結紐宮保雲汀制府題蟠龍丈人四字泐石松下託根盤
 古前垂蔭千載後從此傲風霜茲山同不朽

雲臺新志卷第十四 金石
（此處為模糊的刻文或碑文，內容難以辨認）

雲臺新志卷第十四

金石

秦始皇東海上立石

史記始皇三十五年立石東海上胸界中以為秦
東門漢書地理志東海郡胸班固自注秦始皇立
石海上以為東門闕續漢書郡國志胸劉昭注山
海經都州在海中一曰郁州郭璞曰在縣界博物
記縣東北海邊植石秦所立之東門
案史記言立石東海上胸界中明非立石胸山
也班固亦祇言立石海上劉昭注郡國志胸下

一引山海經明指爲郁州一引博物記以爲縣
東北海邊考郁州本在漢胸縣東北則始皇立
石東海上當爲今之雲臺無疑

後漢東海廟碑

趙明誠金石錄漢東海相桓君海廟碑云惟永壽
元年春正月有漢東海相桓君又云熹平元年夏
四月東海相山陽滿君其餘文字完者尙多大略
記修飾祠宇事而其銘有云浩浩滄海百川之宗
知其爲海廟碑也鄭樵通志金石略東海祠碑漢
永壽元年立洪适隸釋予官京口日將士往來胸
山者云海廟一椽不存不復見此刻矣顧藹吉隸
辨案碑永壽元年東海相桓君修飾殿宇部掾何
俊等欲爲鐫石桓君止之熹平元年後相滿君惜
其功績不著乃爲作頌立碑

東海廟碑陰

顧藹吉隸辨一行十七字其文曰闕者秦始皇所
立名之秦東門闕事在史記案碑有云口闕倚傾
卽此闕也

隋王謨題名

文曰維大隋開皇三年歲次癸卯四月在葦朔十

七日使持節上儀同海州諸軍事海州刺史南陽縣開國侯京兆王謨巡歷至此。因巡來至此矚海看波流自此一度往何日更回眸。

右勒釣臺石壁案王謨隋書無傳隋海州刺史可考者得房恭懿李亮二人是刻爲開皇三年案房恭懿傳開皇初授新豐令政爲三輔最超授澤州司馬遷德州司馬在職歲餘拜海州刺史是其歷官考績頗閱歲時其爲海州刺史當在王謨之後考隋書百官志總管刺史加使持節又上儀同爲從四品開國侯爲正二品王謨

殆以總管刺史著功績故勳品較隆歟隋代如樊叔略以汴州刺史加大將軍安定郡公公孫景茂以息州刺史加上儀同三司可證也又案開皇三年十一月甲午罷天下諸郡以州統縣自是刺史名雖存職理一郡而已是刻爲四月尚在未改制以前也

唐鬱林觀東巖壁紀磨崖

文曰東海縣鬱林觀東巖壁紀。紀曰惟大唐開元七年歲在己未粵正月庚寅朔時大人出爲海州司馬禮當巡屬縣問耆疾周覽海甸察聽毗謠

人無事矣乃迴駕惕想眇矚雲山尋紫翠之所登
虬龍之道益欲徵靈宅吉洗我塵慮巖巖直上宵
窅傍邃霧月與碧海同深霞朝將赤城爭峻代有
知而不能至者至而不能賞者賞而不能窮者亟
聞我東海縣宰河南元公光發幽躅起子泉石締
思構匠蠲潔形勝遂披叢篁鑿崩壁懸流歎水藏
宿雨而時來臥石埋雲觸搖風而不散歷時花木
紅紫無名人聽笙簧宮商自合固可爲眞人之別
館元始之離宮哉夫登會稽探禹穴慕古長想復
何奇乎豈如志在魏闕心遊江海兩忘出處雙遣

是非惟元公得之矣攀賞未極列壑生陰促駕言
旋攢峰擁騎家君顧而歎曰爾知遊名山勒銘紀
者非思入上元道存虛白亦何能造次不遠而爲
之吾少事雲林長牽塵迹晚齡心事盡於巖間小
子誌之貽夫來者其列座同志次而鐫諸。司馬
男清河崔逸文。朝議郎行海州司馬崔惟忬字
踐直朝議郎行東海縣令元曖字徽明丞閭朝賓
主簿孫克友尉苟抱簡尉上官崇素司兵竇晏

右崔逸文八分書二十一行行十七字字徑三
寸勒故鬱林觀東巖石壁吳玉搢金石存云唐

東海縣鬱林觀東巖壁紀海州司馬崔惟忬男
崔逸撰不著書人名氏或亦逸筆也今在海州
鬱洲山之麓境地幽僻人跡罕至歲久蘚蝕椎
拓絕少予宗人麗南僑居東海嘗因遊屐所至
獲見是刻埽滌塵翳手錄其文以歸知余篤嗜
分隸亟爲余言余愆憇搨之因又言此刻之外
尚有宋蘇唐卿篆書石曼卿草書並刻巖間藤
蔓落封頗難識認予聞之興益勃發戊午冬日
重錄金石文將畢以不得致此數碑爲憾因作
詩促之明年正月乃先寄摹本俾予入錄將

覓善工徧搨諸刻以旣余志余案趙氏金石錄
目嘗載是記特未及跋尾是此刻曾一入歸來
堂中但自趙氏而外迄今絕無知者海上居人
如蟻四方遊鬱洲者歲不下數千人亦竟莫知
山下之有此刻若非麗南之冥探窮搜將益溼
沒不復可見而適以益予之不足則尤爲可幸
也鬱林觀今已不存山左右數里居民希少且
山石高聳必架木緣絙然後椎拓可施亦大未
易事今案趙氏金石錄引此刻誤作崔文逸顧
乾雲臺山志又誤以孫克友爲孫亨友崔志又

誤改記中代有知而不能至之代爲殆今據石刻改正

宋海清寺塔柳巒記碣

文曰維天聖元年歲次癸亥十月辛酉朔八日戊辰建塔都維那柳巒糾化同會弟子史玩劉仁製郭忻宋晟許志牛智孫璨徐景王肅正韓緒王進劉岳劉巨滔劉翽新人林澤柳祐已上各備小麥一石米五斗油三觔錢乙百文足潘靖柳遇柳惠柳逸□□徐景徐訥相餘慶相興等兩家共備小麥一石油三觔米五斗錢乙百文足修設感聖

恩起塔大棗一十三會再會轉化千名赴棗施主每名錢乙百文足添興釋迦真身舍利阿育王靈牙寶塔竊以此塔鎮在海城靈基山東南角大唐第二之尊上觀似從天降下迴徹清霄下看似從地湧成寶堂連海求相而千花撩遶告佛而万瑞分明宿菓等今代遭逢同會者劫末近佛感得皇王萬歲四塞安寧郡宰千秋庶民康泰積記標鐫永爲不朽者書記俗士牛景寫碑俗士牛道寧同建塔助緣僧海清宗汜德長宗玠文忠宗誥道圓懷珪功德主僧宗傳造塔都料泗水成守元鐫

右碣在大村東北海清寺塔內西壁長約二尺
文十九行僅闕數字蓋塔成而爲施捨修齋之
記也中間齋作柔繚繞作撩遶萬作莒皆當時
俗字所稱宿菓謂宿有因果耳

海清寺塔糺會記碣

文曰南贍部洲大宋國海州東海縣造塔維那柳
巒伏爲建造阿育王真身舍利寶塔將發願心糺
會縣界

右碣似募榜嵌塔內東壁廣三寸長尺許文二
行未載年月案建塔在天聖元年則此榜必落

成時同勒石者

海清寺塔盛延德等記碣

文曰朐山縣西山東保上林村施主盛延德與闔
家眷屬等謹捨淨財壹百貫文口於東海縣海清
寺舍利塔上同添修建同付勝刊上祝皇帝皇太
后萬歲重臣千秋文武官寮保安祿位次願延德
闔家眷屬等朝納百祥常逢善友謹錄眷屬題名
如後。盛延德男忠信次男忠恕亡過妻解氏三
娘妻劉氏一娘。男婦魏氏三娘井氏八娘次男
婦張氏一娘女二姑三姑孫女不採右件眷屬等

謹具題錄如前口石爲紀以陳不朽之道更望先
亡久遠不口口途苦早登菩提之彼岸時皇宋天
聖三年十一月十八日記沛國子朱湘書長安鄧
文吉鑄。奉化界弟子曾榮眷屬等天聖二年正
月內設供僧八百五十人天聖三年設供僧九百
人天聖五年設供僧一百人共計壹千八百五十
人天聖五年四月十日記

右二記在塔內東壁同刻一石石高尺廣倍之
前記十七行真書後記四行行書

海清寺塔縣令蘇可久等記碣

文曰東海知縣碑記。朝散大夫行東海縣令蘇
可久捨鈴一口甄七百三十三口資薦亡妣亡父
妻蔡氏捨甄一百五十口追薦亡妣亡父捨鈴一
口追薦亡男二郎長女蘇氏三娘捨鈴二口保扶
父母將仕郎守東海縣尉兼主簿事王淳並妻劉
氏共捨鈴二口大甄三百口天聖六載歲次壬辰
六月一日題記手分倪文忠書

右碣嵌塔內西隅壁高二尺許額曰東海知縣
碑記六字三行文十一行並真書案記內題名
先妣而後父幼高而長卑當非知縣縣尉所記

蓋委諸手分倪文忠書而刻之者

海清寺塔單和記碣

文曰南瞻部州大宋國海州懷仁縣東南保新興
村清信弟子單和並合家眷屬等共發宏心捨錢
壹百千□□貫足同修東海舍利塔弟一給今
合家有名者單和七妻許氏六娘妻趙氏一娘男
文習男文政男文志男文瞻婦陸氏八娘趙氏三
娘林氏四娘楊氏二娘孫男仁美仁貴仁安仁順
仁福□□鄭畱猗屎謝婆孫男鄭氏三娘管氏四
娘臧氏一娘張氏四娘蔣氏二娘孫男王公巧哥

馭年天聖十年正月□日記

右碣在塔內東壁文十行額間尚存倒書八九
字結體酷似聖教序蓋前代碑版爲宋人磨滅
倒刻此記殊可惜也文中驢作馭級作給亦爲
乖迕

懷珪題名

文曰懷珪記

右刻在鷹遊山文剝蝕不具案海清寺塔天聖
元年碣有懷珪名當是一人故附於此

祖無擇三言詩刻

文曰清原王公衮君章武功蘇唐卿致堯范陽祖
無擇擇之。起驚濤放溟渤披宿莽履岬岫惕盤
石解簪鞞挹飛泉醒心骨揮高論謝俗物思古人
自終日足飲酣清思逸卽絕壁試奇筆千萬年蒼
苔沒後有人爲吾拂。宋慶厯甲申歲秋七月辛
卯朔擇之文致堯筆君章刻

右文十二行行七字字徑八寸篆書勒鬱林觀
東巖下大石東面吳玉搢金石存云此刻在開
元七年崔逸東壁記之側歲月久遠苔蘚侵蝕
人莫能識且巖石高險難於椎拓故世遂絕少
傳本子廣搜古今墨搨垂二十年宗人麗南始
以告予郁洲僻在海壖非宦遊孔道故博雅好
古之士皆不得一躡屩其地而居其旁者多樵
夫牧豎縱日過其下又漫不省爲何物故三君
之名雖與山石並永然雨淋日炙蓬堞蔽翳亦
幾與未嘗鐫勒者等予旣獲見亟錄一通編入
古今篆刻之次雖未必能如昌黎之於岫嶠石
鼓歐陽子之於庶子泉銘一經揚扝奕世不泯
倘得藉三公之靈使予之綴集賴以不朽或亦
終不至湮沒失傳耳

楊公持題名

文曰鄭圃楊公持公承東胸譚亨父同遊大觀丁亥

右文三行共十八字字徑三寸真書勒石延年詩刻後

石延年詩刻

文曰上躡師子石下有濯纓泉石崖對鐫磨唐宋畱二賢大暑日不到銀河傾九天花氣曉熏谷春水如佩懸坐久捐埃塵冠弁斯泠然。石曼卿賦此詩狀此景窮寫勝概曲盡其情而無石刻以爲之紀好事者記於州之永安寺壁慮其歲月深遠頽毀不存今刊於此以永其傳蓋將託是詩以不朽焉丁亥十月譚亨甫題

右文五行行十字後譚亨甫題六行行十二字字徑二寸五分真書勒故鬱林觀東巖下大石南面案曼卿詩刻宜列余授前因磨崖爲大觀丁亥故列於此

劉居實題名

文曰通判海州劉居實德充案行屬部過妙雲觀登師子崑至鬱林觀少息投宿海清宮重和二年

仲春十有一日

右文五行字徑三寸行書勒故鬱林觀石壁在
宋四士題名後案是年十一月改元宣和故仲
春猶稱重和

適野亭記

文曰適野亭記。宋提督京東路水陸軍馬范滎
撰。將之臨邊謀敵國也必曰境土復而兵罷侵
疆歸則兵弭神州赤縣厥今安在是固擁貔貅總
水中龍虎專闖者宜蚤夜相與以謀焉可也乃燕
閒遊息之地必寓意以寫其忠義之誠則適野亭

其志矣惟亭因山薙草而有補於國之大事夫豈
爲登山懷遠飲酒高會謂從軍之樂欲遵海而南
也哉此爲捲黃腫兼曲阜清敵塵於海岱之間以
稱夫職分當然之寄者已知此則茅茨之下亦籌
邊之所也高平侯志在於是而其從事李庚遂名
之此耳嗣事者幸無媿鄙豈有宋隆興二年秋八
月二十有三日記

右在鳳凰山麓案記中所稱高平侯考宋史隆
興元年詔以鎮江御前司統制魏全守海州以
時考之疑卽魏全此記撰於隆興二年八月考

宋史是年七月金人索海泗唐鄧四州地宋遣
盧仲賢報之仲賢至宿州布薩忠義懼之以威
仲賢惶恐以忠義遺三省樞密院書來張栻奏
仲賢辱國八月胡銓上書言海泗今之藩籬咽
喉也彼得海泗且決吾藩籬以瞰吾室扼吾咽
喉以制吾命據此則是時疆場多事非燕閒遊
息時記中言亭因山薙草又言茅茨之下亦籌
邊之所其志可知案是年十月魏杞如金許割
四州則所謂捲黃腫兼曲阜清敵塵於海岱之
間者亦爲虛語矣又案名此亭者爲從事李庚
考紹興十二年進士有李庚字長子臨海人歷
官監察御史知袁州有集號詒癡符自紹興十
二年至隆興二年己二十二年不應仍爲幕職
此或別一李庚也

趙東題名

文曰淳祐壬子仲秋上弦郡守漢中趙東明叔郡
丞北海王瑁君玉遵海而東巡歷至此訪臺浦之
遺跡玩扶桑之朝曦剝苔讀詩慷慨弔古臨風秉
筆聊以紀歲月云省客蒲纓口植立甫三山陳贊
楚客古莒劉津濟川北海周國華實夫長子旦次

興孫侍

右勒釣臺側案王子爲宋理宗淳祐十二年元
憲宗二年趙東王瑁等俱無考宋理宗紀淳祐
四年知海州者爲周岱趙東其繼岱者歟是時
當李全于忙兒弄兵之後猶能剝苔讀詩具此
勝情又元憲宗紀三年三月攻海州戍將王國
昌逆戰於城下敗之獲都統一入距趙東題名
時纔七月未知東在行間否史文不具莫能考
也因歎士大夫受命巖疆或雅歌服人或清談
誤國固未可同年語矣

宋四士題名

文曰宋四士嘗登山。石林虞仲子水石草堂道
人無礙居士芝臺翁

右刻前一行六字篆書字廣二寸長三寸後四
人每一人爲一行行書字徑五寸勒鬱林觀東
壁唐隸後案題名無年月篆書宋四士嘗登山
蓋在金元間宋之遺民所題故隱其姓名篆法
古勁行書亦佳

石林虞仲子題名

右刻只石林虞仲子五字行書與前刻筆法相

雲臺新志 卷第十四
似但差小耳勒東壁下石面橫書
亢之等題名

文曰亢之同來。祖貺。同遊

右刻三行亢之同來爲一行祖貺爲一行同遊
爲一行字徑三寸半行書勒石林虞仲子題名
東石面上案筆法亦與前刻相類雖別一石若
遙相應但石堅刻深全無剝泐不知祖貺下何
人以空而不書也

金宋蟠題名

文曰縣令淇水宋蟠伯升父蒼梧房真子正彭鑄

壽元陳汝霖濟卿僧普照德誠行深同遊介侍父
縣令偕行大定甲午夏四月十有五日

右勒釣臺側案甲午爲金世宗大定十四年宋
孝宗淳熙元年是時海州屬金考金史地理志
海州有胸山贛榆東海漣水沐陽五縣宋蟠題
名在釣臺殆東海縣令歟又按宋蟠唐州志作
審蟠近得舊搨本辨爲是宋非審故改正

五龍聖泉題勒

文曰五龍聖泉。承安二年。襲封千戶
右在大義村溫水河側

下缺

明東海孝婦祠碑

成化十五年海州舉人劉昭撰

郭鉉題名

文曰欽差總督蘇松淮揚海道諸軍事鎮國將軍都指揮同知合肥郭鉉巡邊至此見前代諸公畱題遂書此以紀其歲月云大明成化丙午秋九月望日識守禦東海營都軍政武略將軍武文通奉郭差委來勒石因而遂勉書之

右真書勒釣臺石壁按唐州志作在秦山誤據李普元東海志也

東海孝婦祠碑

嘉靖六年州同李枝撰

海州重修萬金坊石橋記

嘉靖八年右春坊太子贊善淮陰蔡昂撰

東巡觀海記碑

嘉靖十一年知州謝純志撰

重修秦山碑

右碑在秦山額題重修秦山碑記六字篆書文率梵夾語碑陰有記皆真書多剝蝕不可讀微辨正德庚辰嘉靖甲辰等字蓋嘉靖間碑也篆

真皆不佳

海州重建英烈祠碑

嘉靖二十五年知州王同為東海孝婦撰

鬱林觀東巖題勒二則

文曰採山釣水抹月批風。飛泉。中泉王同書

題東海孝婦祠碑陰

嘉靖二十七年餘姚聞人憲行題

王同題名

文曰嘉靖己酉夏至海郡守王同公出到此題名
備倭熊恩胡思忠也

右勒釣臺石壁按唐州志作在鷹遊山誤據李
普元東海志也

水簾洞題勒

文曰神泉普潤。高山流水

右真書欵識剝落不可辨案李普元東海志以
為明嘉靖中知州王同所題

水簾洞題勒

文曰靈泉

右篆書無欵識

唐伯元遊東海青峰頂記碑

右勒雲臺山天然碑上

海州三元廟碑

萬曆二十四年魯泰興王壽鏞撰

案明史諸王世表魯肅王壽鏞初封泰興王

海州純陽庵記碑

萬曆二十七年張朝瑞撰此庵久圯道光甲午重建海曙樓以此碑嵌於樓下東壁

敕諭海州團圓宮碑

萬曆三十年

海州雲臺山三元廟碑

海州青峰頂大僊庵記碑

二碑皆萬曆三十一年張朝瑞撰

敕賜護國三官廟碑

萬曆三十一年禮部尚書馮琦撰文陝西按察司副使邢雲鷺篆額武英殿中書舍人程守訓書丹右真書在雲臺山三元宮文頌太監陳增泰等不足錄

嘯雲洞題勒

文曰乍見天吳泰昌元年杜一璠題

敕賜護國三元宮海寧禪寺碑

崇禎四年張兆增撰

陳維恭詩刻

文曰我來斯君奮出果前期綬後卹平生歡鞭弭
役輕購寫防色赭。崇禎九年冬十月甲辰守海
州陳維恭中來記

右文四行行七字字徑八寸五分篆書勒故鬱
林觀東巖危石上

海曙樓詩刻

文曰蒼茫僊嶠俯層樓此日登臨足壯遊畫檻半
依星斗近彩虹斜帶海門浮春波蕩日吞還吐曉

樹籠煙散復收最喜邊關奇絕處可無銘字勒山
頭

右真書不著名氏案此詩見崔志藝文門題李
上林名道光甲午重建海曙樓嵌於門外西壁
其東壁爲孟養志詩刻微辨海國初升火珠千
斗數字

東鳳凰山龜崖題勒

文曰郭德舉臥東山

案此刻無年月或疑爲晉河內軹人郭德舉究
無左證

國朝重建海州雲臺山青峰頂記碑

康熙十九年漕運總督帥顏保撰文內翰林院侍講學士孫一致書丹太常寺少卿楊名耀篆額

雲臺山三元宮碑

康熙十九年大學士索額圖撰

雲臺山觀音殿碑

康熙十九年大學士索額圖撰

右二豐碑因甚重不能運至山頂遂亭於大村乾隆中爲牛鬪所碎

萬蕭裔詩刻

康熙三十二年勒雲臺山三元宮壁

蕭裔滿洲人康熙三十二年知海州案東磊亦有蕭裔題刻萬壑朝宗四大字

登雲臺山記碑

康熙四十九年知淮安府會稽姚陶撰知州楊宗禮跋

海州觀音堂九嶺山膳田記碑

雍正十三年知州李震撰

海州法起寺碑

乾隆元年州同李徧德撰

雲臺二十四圖

乾隆二年江寧黃申瑾摹勒

海州法起寺碑

乾隆三年知州鄭謙撰

海州鎮海寺碑

乾隆二十四年知州李永書撰

海州法起寺碑

乾隆四十三年知州林光照撰

琉球國銅鑪

文曰嘉慶丙子夏琉球國八品巡見官毛朝玉等

二十三人海舶遇颶風飄至海州鷹遊疊知州師

亮采日給廩餼請大府 奏送閩附船還國朝玉

臨行以鑪相貽因供奉宿城山法起寺並系以銘

• 三品金一瓣香航海來兮波不揚 • 嘉慶丙子

秋月朝議大夫知海州事韓城師亮采題

右鑪製若巨鉢闕其前重一百五十三兩今在

宿城法起寺

海州鎮海寺膳田記碑

嘉慶二十一年知州師亮采撰

雲臺山磨崖

文曰觀察唐仲冕知海州師亮采參將陳階平巡
歷登此

右隸書七行字徑四寸勒雲臺山崖案東磊亦
有亮采題刻登山觀海四大字

宮保陶公雲臺詩刻

右刻高九寸長三尺八寸二十九行字徑七分
行書詩載山水門此刻冠以崑山張仲英所繪
宮保像程侍郎恩澤作贊曰英雄其形大儒其
心獨立蒼茫而謀畫自深上以承日月之光下
以沛山海之霖文四行篆書後附俞德淵謝元

淮許喬林次韻詩刻皆真書

宮保陶公蟠龍丈人歌詩刻

右刻高九寸長五尺五寸五十七行字徑七分
行書詩載靈樞門

宮保陶公海曙樓額

文曰海曙樓。雲臺山頂有海曙樓為望海觀日
出之所久圯矣余壬辰登山至此但見荒厓一片
寸椽尺桷無存者因倡捐選匠修復之以無忘名
蹟道光十四年仲冬落成因揭還舊額兩江總督
使者安化陶澍識并書

右刻高一尺六寸廣五尺海曙樓三字三行字
徑一尺跋八行字徑一寸四分並行書

宮保陶公蟠龍丈人碑

文曰蟠龍丈人。道光壬辰。長沙陶澍題。

右碣高五尺草書字徑六寸

宮保陶公雲臺山題名

文曰道光十五年夏四月廿四日太子少保兵部
尚書總督兩江使者長沙陶澍以閩伍奎海州重
登雲臺山同行者刑部主事吳縣曹懋堅前知海
州韓城師亮采前知江都縣錢塘陳文述太湖同

知巢縣劉大烈淮北監掣同知山陰陳在文署海
州知州海康王夢齡贛榆縣知縣烏程徐林春無
錫縣知縣松滋謝元淮海州州同耒陽羅登瀛海
州州判合肥龔照琪寶山縣縣丞咸寧劉琅代理
海州州判海陽趙莊海州叅將瀚海德本東海營
都司丹徒趙雲炳及州人前知山東平陰縣許喬
林

右行書二十行字徑二寸勒雲臺山崖

宮保陶公高公島題名

文曰大清道光十五年四月廿六日子以閱兵東

海遂登高公島眺望於時午潮正上海風不起鷗
鳥千百回翔水面令人飄飄然有振衣千仞濯足
萬里之概同行者吳縣曹楸堅錢塘陳文述韓城
師亮采及從官知海州王夢齡淮北監掣同知陳
在文知無錫縣謝元淮東海營都司趙雲炳前知
山東平陰縣州人許喬林也。太子少保兵部尙
書總督兩江使者楚南陶澍記并書

宮保陶公海曙樓銘

右行書十二行字徑五寸勒高公島石壁

右刻高一尺字徑七分行書文載勝蹟門

宮保陶公仙人屋詩刻

右行書勒宿城山仙人屋內詩載勝蹟門

宮保陶公仙人屋題勒

文曰仙人屋。道光乙未。陶澍題

右行書字徑一尺題欸字徑二寸四分

宮保陶公玉女窗題勒

右三字行書字徑一尺勒仙人屋外石窗上

宮保陶公虹梁石題勒

右三字行書字徑一尺二寸勒仙人屋外西首

石上

宮保陶公金剛石題勒

右三字行書字徑一尺二寸勒金剛巖上
宮保陶公畱雲嶺詩刻

右行書勒碑在畱雲嶺道東詩載勝蹟門

雲臺山神廟碑

道光十六年署兩淮淮北海州分司運判江蘇常州府無錫縣知縣謝元淮撰文前廣西西隆州八達州同兩淮候補鹽運司經歷馮鼎祚書丹文載寺觀門

右真書在雲臺山三元宮

宮保陶公雲臺山新建陶靖節先生祠堂記石刻

右楷書凡三十九行後附 宮保所撰靖節先

生爲鎮軍建威參軍辨凡四十六行陳芝楣中

丞跋凡十六行俱楷書嵌靖節先生祠堂壁文

載勝蹟門

晉鎮軍參軍陶靖節先生祠堂膳田記石刻

道光十八年兩淮鹽運使司海州分司運判童濂
撰文并書

右楷書後附膳田畝數四至亦楷書嵌靖節先
生祠堂壁文載勝蹟門

卷第十四
 三
 雲臺新志
 卷第十四
 三

雲臺新志卷第十五

藝文

謹案郡縣圖經藝文易濫而模山範水題詠尤
 繁明張元怵雲門山志凡五卷而藝文多至四
 卷末大於本非佳志也今用彭簪衡嶽志例采
 摭詩文各附本景之後別仿史法立藝文一門
 凡干涉茲山彙編成集者入焉祇載書名錄原
 序固志筆謹嚴之義爾其前代勅諭無可附麗
 因列於藝文之首彼釋廣賓天竺志所侈稱為
 帝王檀越品者則闕於志例矣

明代頒賜藏經勅諭一卷續頒藏經勅諭一卷

明神宗時慈聖宣文明肅皇太后命工刊印續入藏經四十一函起華嚴元談會元記至第一希有大功德經計四百一十卷并舊刻藏經六百三十七函頒布雲臺山清風頂三官廟尊藏特賜護勅并御製序文繁不錄

歷代雲臺山詩四卷

明杜一璠編一璠海州人諸生
雲臺山詩一卷

杜一璠撰

雲臺山三十六景詩一卷

顧乾撰乾海州人歲貢生歷官樂陵王府教授著有雲臺山志自號蒼梧野史

雲臺山三十六景詩一卷

顧坤撰坤歲貢生歷官武定州學正

復山集二卷

國朝江之菴撰之菴字杜若諸生順治十八年兵部尚書蘇公納海等因海氛未靖請將沿海村屯遷移內地畫雲臺山爲界外是爲裁海康熙十五年之菴陳於督撫又三年

朝議雲臺復爲內地是爲復海之蒞因編是集

帥顏保復山集序

本

順治辛丑海氛不靖厘

聖天子南顧之憂建言者以爲水瀕深阻慮有勾引畫
爲清野之計盡徙沿海民於內地而東海雲臺
一山亦在斧畫之外頃伏莽潛消凡附近內地
有裨軍國可資捍禦者漸次興復於是東海江
生之蒞始以復山請余爲繕疏入告我

皇上愼重邊防卽簡部院大臣會同督撫漕河諸臣
親行踏勘繪圖呈

覽得

旨俞允而雲臺復爲內地繼而繕營壘嚴斥堠增兵
固守屹然爲海防重鎮而民廬亦漸復

國課亦漸升猗歟盛哉余聞古者岳瀆視諸侯其在
典禮有功德於民則祀之五嶽四瀆興雲致雨
鍾美聚物其利於民也大矣詩云維嶽降神生
甫及申蓋山嶽之精有時誕育忠貞以翊運輔
世爲國楨幹故秩祀不衰雲臺之爲山卽古所
謂鬱洲山也傳聞自蒼梧飛來語其摩天接海
迴絕宇宙誠未能比跡嵩華至於屹立海曲作

鎮東邦則有非他山川供遊覽誇奇秀之所能
同日語者余履行其地登高峰臨大壑振衣千
仞極目萬里北瞻則拱揖

神京屏蔽齊魯南望則窮極滄溟襟帶閩粵東指則
顧視遼碣滄瀛在目西顧則控引江淮諸水朝
宗雖僻在一隅而扼要據衝實天下之股脊喉
臆也豈得與水瀕渫奧之地同類而甌脫弃之
耶此內外諸臣所爲不謀同辭皆謂宜復我

皇上宸衷獨斷不待再計誠所謂明見萬里之外也
而山川之有神靈奇怪者固不可廢卽廢焉亦

終復於此亦可見矣先是山有三元行宮瓌瑋
巖麗寰區無與匹禱祀者梯山航海奔走天下
自山之廢父老尤以爲戚余諭諸耆隱徵諸故
實僉曰前代尊祀之典幾與五嶽等夫神能護
國庇民爲人所敬祀倘亦維嶽所降有功德而
可祀者耶是其祀亦不可廢余故委員葺治俾
還舊觀於漕運河道未必無默佑云此一役也
上利

國計下益民生中協人神皆可紀也故樂爲序而傳
之

卽林園雜詠一卷

吳之棻撰之棻字澹村海州人

雲臺山三十六景詩一卷

方洲撰洲字瀛嶼海州人嘗題對山圖云郁洲峙東海北向當我樓布襪青鞵意所愜有時策杖追浮邱又有愛山有癖如啖蔗句惟其所癖在斯故詩味雋永亦如啖蔗

宿城八景詩一卷雲臺山二十四景詩一卷

李大全撰大全字問原海州人幼時從其師登雲臺山有白雲生石縫句郁洲山人吳恒宣呼為李

白雲長而以煙霞為痼疾自號白雲外史

雲臺草一卷

毛呈兆撰呈兆字祉臨沐陽人諸生

雲臺紀遊詩一卷

孫讀撰讀字倩螢山陽人諸生

吳之椿孫倩螢雲臺紀遊詩跋

樗圃文略

郁洲並壁舊載荒經海嶽一隅孤撐微服峰向蒼梧而飛下幾費夸娥波連蓬島以揚來空勞精衛荆榛半沒煙蕪若木之華岫壑長封蘚蝕巨靈之跡非終南之捷徑佳處誰傳鮮西蜀之

雲亭間奇偏少致使春花帶雨暗掩鶻紅秋月
澄波空流溪碧山靈慨其嘆矣海若能無笑乎
則有繡虎文人雕龍才子枚臯宅畔偏多作賦
之才趙嘏樓頭舊是吹簫之侶泛扁舟於海曲
初來洛下機雲夢春草於池塘不愧謝家昆弟
爾迺東山蠟屐九日囊茱跨祖龍鞭石之梁探
穆滿靈芻之島遐瞻遠眺元覽冥搜霜葉千巖
爭披落日稍香十里幾過花村方振袂以長吟
直落九天咳唾乃興酣而落筆不煩一字推敲
百千年生面爭開林巒改色三十首錦囊滿貯

珠玉聯編睹茲篇者詎非登蜃海之樓臺雲霞
萬狀入鮫人之織室綃縠千純者乎嗟乎天地
之奧區終難莽伏山靈之窟宅端藉人傳向非
長吉之詩會見榛蕪昌谷藉少興公之賦行將
塵盪天台吾於斯編卜山靈之幸矣誰其和之
效鄰女之顰乎

雲臺山三十六景詩一卷

羅珍撰珍字鏡塘海州人有蘊輝書屋集

蒼梧賦集二卷蒼梧詩集二卷

程樅編樅字文業海州人

雲臺山三十六景詩一卷

程樞撰

雲臺草木雜詠一卷

程炯撰炯字鑑堂海州人

雲臺雜詠一卷

方槩撰槩字絜齋海州人拔貢生官直隸高陽縣知縣有絜齋詩集

半山園讀書雜詠四卷

方薰撰薰字蘭谿海州人諸生半山園在雲臺之麓爲明顧乾讀書處乾隆中歸揚州程杓今爲方

氏別業薰重加葺治有泉石花木之勝嘯詠其間積成卷帙

雲臺山三十六景詩一卷

汪縉撰縉字秋士海州人諸生有吟秋居士集雲臺紀遊詩二卷雲臺訪僧詩一卷

朱照撰照字右容海州人監生有野鶴居士集

雲臺山三十六景詩一卷

吳振勃撰振勃字筠齋海州人歲貢生有筠齋詩草

雲臺山唱和詩四卷

道光壬辰夏四月兩江總督

宮保尚書陶公巡歷至雲臺山賦詩四章海內屬和者百餘家附沭陽道中詩曉發沭陽入海州詩海州道中詩及蟠龍丈人歌凡四卷爲印心石屋詩薈之一元淮受而錄之雕板藏海州石室書院洵足資名山嘉話

陳文述雲臺山唱和詩序

本

天地有非常之境得非常之人而始彰古今有非常之人得非常之境而其才益顯非特功業之表著也蓋亦有文字焉如

宮保兩江制府安化陶雲汀先生雲臺山唱和詩是已雲臺山者古郁洲山也爲海上十洲之一相傳自蒼梧浮來上多南方草木舊在海州境中中隔洪流六朝時曾僑置城邑自黃河南徙漲沙漸遠土人有走馬上雲臺之謠至今國朝乾隆中而其言遂驗秦本紀載始皇立石東海上胸界中以爲秦東門三字疑卽斯地山勢東向寅賓出日當卽古之暘谷蓋非常之地也河發源崑崙委輸經茲山之麓以入海兩峰遙峙實惟坤輿之軸而詩文不多見僻在海隅雖有

非常之境而不遇非常之人則亦若隱若見屹
立於寬閑寂寞之濱而已先生學窮五際才擅
九能讀經世書抱安民略道光乙酉南河高堰
潰淮水橫決運道梗塞先生自皖移節撫吳經
理海運全漕安抵津門無片帆粒米之失浚吳
淞江力闢建閘禦潮之議浙西六郡水利至今
宣暢丹陽練湖向稱巨浸自改湖爲田而運道
多梗塞先生乃躬親相度重建黃金閘移黃泥
閘於張官渡以資收蓄更闢橫閘出江之路以
通漕回空遂無滯先是運河猶婆灘有活沙旋

浚旋淤相傳有靈物潛伏噓氣所致先生飭工
員窮治極深而堅土見積患旣除浮言亦息其
在皖也遵道光元年

恩詔表章前代忠烈節義上及六朝其撫吳也彙案
請

旌武進陽湖兩縣貞節婦女三千十八人建總祠總
坊以表記之非常例也

聖朝廣大之恩惟先生精誠有以格之因通飭三江
所屬郡縣遵行並咨行各省大吏發潛德而闡
幽光實爲史冊以來所未有所謂非常之人惟

先生足以當之兩淮漕務者

國家之外府也數十年來經理失宜商人欠帑至數千萬力不能辦運課無所出六省之民將淡食淮北積疲尤甚素恃淮南調劑南商乏而北商益困丁飢於場梟橫於道隱患所伏識者憂之歲辛卯

天子知公能任艱鉅裁鹽政以漕務隸總督先生經理淮南逾年商力漸復知淮北商運之終無濟也親至海州相度籌畫試行票鹽登茲山以覽形勢賦詩紀事而山之名勝因以益著所謂非

常之境得非常之人而始彰者庶幾近之昔康樂石門之賦逸少蘭亭之詠少陵北征之篇昌黎南山之作非不闢前人未經之徑然不過藻繪川原潤色林壑已爾若夫紓經濟於泉石之間寄忠愛於煙霞之表使讀者曉然於名臣心跡之所在則非先生詩不足以當之而海涵地負天高日晶卽境論詩並爲卓絕所謂非常之人得非常之境而其才益顯者讀此詩益信斯言之不誣也流播旣遠和者遂多謝君元淮彙錄付梓屬述爲文以序之先生旌節所至英彥

引領雖虛懷若谷不以海內龍門自居而士之承下風望餘光者與述師儀徵阮雲臺節相並稱節相之深厚先生之博大姚宋韓范海內具瞻詩亦左太白而右少陵酌東坡而挹山谷也述於先生同舉嘉慶庚申鄉試先生撫吳始以海運事謁見而苔岑之誼至今拂拭有加竊謂先生之政爲閭閻培元氣也先生之詩爲壇坫表正聲也則斯編之在天壤又豈柯古題襟松陵唱和所可同日語哉願與海內讀先生詩者共和之更與和先生詩者共證之也

許喬林雲臺山唱和詩序

本書

道光十有二年歲在壬辰夏四月總督江南江西

宮保尙書長沙陶公以閩兵至海州巡歷鹽池察官屬諏民隱遂登雲臺山升香三元爲民祈福禮也山僧乞書因賦詩四章喬林從鄒觀察錫淳謝明府元淮最先屬和旣而名篇輻輳謝君雕版石室爲茲山勝蹟焉喬林謹案紀遊唱酬之詩其著錄於

四庫總目者祇二部朱子張南軒林用中之於衡嶽

袁華顧瑛楊維禎之於玉山詩以人傳也雲臺古之郁洲載於山海經實爲禹迹而詩人題詠至宋蘇文忠公始顯近世如少師楊勤恪公四知堂集漕督管公松厓詩鈔方伯唐公陶山詩錄今節相阮公擘經室集皆有登雲臺山詩爲山靈生色而和者蓋尠維

宮保公倡卿雲之元音薈賓雲之藻韻珠排冰叩蔚爲鉅觀洵茲山曠代之奇遇也我

朝總制大臣按部海屬親閱營伍者自此始而三江重寄兼筦六省鹽筴者亦自此始夫兩淮之積

困窮疲久矣淮北尤甚非仰給水衡金錢卽覬覦南商調劑馴致殷富亦貧場竈倍困大農祇存空籍鹽政視若畏途嵒窳抗敵不可爲己公於無可措手之中集思廣益酌古宜今籌粟鹽以拯之躬歷海隅周覽島鹵進亭戶矐丁諮詢曲折廼定議試行旣奉

俞旨刊布條約旋見役車聯楫估帆駢坐四方民大和會果能上裕度支爲北綱多年未有之盛事凡以鹽爲業者如積玉元圃昔儉歲而今豐年諸垣曬鹽丁壯素不宿飽今鼓腹於南薰時暘

之餘游手牽車盪漿亦得傭力以自活是秋水
潦害稼而淮海晏然者粟鹽之效也昔甄琛謂
集天地之產惠天地之民藉造物之富賑造物
之貧真名言哉淮北數十年來產鹽之饒自若
也商乏不支而地非愛寶瀕海竈戶數萬人旣
不能茹鹽當飯必不能枕鹽待盡勢將折而苟
就於臬此其隱患恐不止財賦之絀而已賴公
親臨相度灼見癥結凋劫之所由毅然改絃而
更張之於是利權始歸於民古詩曰大農無官空
國家而良民均食其福莠民亦化爲良泮水之詩曰

食我桑黽懷我好音其斯之謂歟夫禹筮爲食
貨之寶路卽良莠所共趨細民競利罔懼刑章
故管子首言謹正漢律亦重鈇趾今粟鹽盛行
遠邇挾貲者麋至而市門之犬生釐津塗無宵
行之警者不獨章程盡善思患豫防也良由海
澨之民氣悍而情慤仰見小隊遄臨拊循周摯
又見和門講武軍紀申明其甘如飲醴其肅若
畏雷有以慝其情而靖其氣且平時威惠夙孚
足以格之詩所稱順彼長道允文允武公兼之
矣是行也以淑問勗有司以無斃訓將士其所

以化飛鳴而使之懷好音者職此之故然則雲臺之詩非紀遊也蓋實政也茲集之傳固非袁華顧瑛輩所能跂及其猶在朱子南軒衡嶽唱酬之上乎至其勳業卓著

聖天子有幹國良臣之褒中外倚以爲重其文章則印心石屋專集天下傳誦方官翰林時詩卷已行海外比於雞林賈之購長慶集焉喬林跼伏雲臺山下部婁之見無以仰測嵩華之高第就雲臺言雲臺亦第就遊雲臺之詩以學詩卽其策六鼇掣長鯨詩芒萬丈燭天照海當與文忠

傳作長畱於松濤雪瀑間爲此山幸實居此山者之幸也夫

謝元淮雲臺山唱和詩跋

本

雲臺山古稱都州山一名郁洲爲海上十洲之一東坡詩中所謂蒼梧山也雲臺之名至明萬厯中始著元氣外周精華內蘊循其周陔則農疇被雲升其崇巔則滄波浴日東南之境實惟奧區壬辰初夏

宮保兩江制府長沙陶公闔伍東海並籌淮北
漕務試行票鹽元淮隨侍使節同遊茲山之上

公周覽之餘首發高唱忠勤之意溢於楮墨非尋常登臨觴詠之作也歸昌既鳴鸞鶴咸應賓雲始奏璫瑟遞諧海內和者甚多元淮受而錄之付之剞劂誌其緣起以廣流布後有和者當續為校刊他日徵淵岳之掌故必以茲集為山中文獻也歟

黃鉞題雲臺山唱和詩後本

蓋海旂幢擁傳來勳名端合上雲臺時閩兵鄴

侯自抱神仙骨施伯曾推天下才萬竈煙濃鹽

筴裕千艘帆趁漕渠開登臨不為閒吟眺十載

東南手澹災

